


浙江採集遺書總錄




		五二	漢書門
一〇	五〇	一〇	
冊	架	函	號

庫	文	閣	內
五	五		漢
二	二		書
一〇	一〇		
架	冊	號	類

內閣文庫	
番號	漢 5210
冊數	10 (4)
函號	297 73

通史編年別史
朝史
禘史
掌故



浙江採集遺書總錄

淺草文庫

丁集

通史類

皇王大紀八十卷

天一閣寫本

右宋承務郎崇安胡宏撰趙希弁曰所述皇帝王
伯之事始于盤古氏而終于周之末自堯以上六
闕逢無紀堯之初載迄于赧王乙巳二千有三十
年貫通經典采摭史傳靡所不載又因事而爲之
論所以述去取之原釋疑似之惑者至矣元天台
董楷曾重刻之有跋

十七史詳節二百六十九卷 刊本

右宋呂祖謙纂自馬史至歐史各就原書刪繁節要合成一編

大事記十二卷通釋三卷解題十二卷 刊本

右前人輯因司馬遷漢興以來將相名臣年表內有大事記之目本其意而編次之有淳熙七年自序謂起春秋迄五代其實所記至漢武帝征和三年止蓋未竟之編也曾刊于嘉定間李大有跋餘詳馬氏經籍考

大事記續編七十七卷 刊本

右明翰林學士金華王禕輯因東萊原書體例而續之自漢迄五代止

十八史畧三冊 刊本

右元前進士廬陵曾先之輯節錄列史大畧取便省覽而已

歷代通畧四卷 刊本

右元休寧陳櫟輯因宋呂中之宋史講義約其文而更廣其例前自羲農後及南宋咸畧舉焉末附蒙求一帙

直說通畧十三卷 刊本

右元鄭鎮孫撰取歷代史事撮舉要畧以俚語編之欲其明白易解故曰直說

世譜增定二卷 刊本

右明南京應天府尹關西呂頴編此譜約叙帝王沿革之緒國統離合之迹其文頗簡蓋流傳舊本也宏治間陳氏璘刊時益以溫公歷年圖梁氏總論至頴又取黃繼善之史學提要分段摘附焉并間系以論

世史正綱三十二卷 刊本

右明邱濬輯本朱子綱目呂東萊大事記參取而

為之始秦終元其斷自秦始皇者自序謂前此為夏商周後此漢唐宋世道一大界限凡建立規模稱謂名考維持法制皆自此權輿之也

史書十卷 刊本

右明休寧姚允明輯亦鑑本之約者自上古迄元事問加評斷焉

綱目愚管二十卷 刊本

右明處州鄭宣撰取宋元史綱目約而重訂之宋十九卷元一卷於書法體例多所糾正云

續資治通鑑綱目廣義十七卷 刊本

右明西州張時泰撰摘錄陳桎原書之要旨加以考證而廣其義例

甲子會記五卷

刊本

右明薛應旂撰編甲子自黃帝時起迄明正德間止專以紀年為主故畧于事

歷代建元考一冊

曝書亭寫本

右國朝秀水鍾淵映撰自上古迄元每代世次年號及興廢本末撮舉其要各為考一篇凡列國外國之大畧俱在焉

歷代史表五十三卷

刊本

右國朝萬斯同撰朱彝尊序云易編年為紀傳古史之法微矣其遺意猶存者吾于表有取焉表或年經而國緯或國經而年緯或主地或主時或主世系事微不著者錄而見之班固而後多闕焉不作伏无忌黃景之諸王王子功臣恩澤侯表邊韶崔寔延篤之百官表作矣而不傳袁希之之漢表熊方之後漢表李燾之歷代宰相年表補前人之闕矣而未備今季埜取歷代正史之未著表者一一補之凡六十篇益以明史表十三篇攬萬里于尺寸之內羅百世于方冊之間皆所必不可缺

者雖附諸史並頒之學官奚不可也 按今本共
五十六表與朱序未符蓋明史表向未出而所云
六十篇者或分合有異耳

編年類

季周傳十二卷 刊本

右明新安程元初輯起周威烈王二十三年盡秦
王政二十五年末一卷別標曰嬴秦傳起始皇二
十六年盡二世元年皆大書爲綱列事爲目仿朱
子體爲之

建康實錄二十卷 開萬樓寫本

右唐高陽許嵩撰晁公武曰始自吳漢興平元年
終于陳末禎明三年南朝六代四百年間君臣行
事及土地山川城池宮苑制置興壞用存古跡其
有異事則注之以益見聞建康者六朝所都地名
也陳振孫謂此書編年附傳大畧用實錄體

蜀漢本末三卷 天一閣寫本

右元梁國公許州趙居信撰仿朱子綱目體詳書
昭烈兩世事蓋亦以正統予蜀也本內間有關頁
續資治通鑑長編一百八卷 開萬樓寫本

右宋敷文閣學士丹稜李燾撰按李文簡公續通

鑑長編于隆興元年知榮州先以建隆迄開寶年
事一十七卷進乾道四年官禮部郎乃以整齊建
隆元年至治平四年五朝事迹共一百八卷進淳
熙元年知瀘州又以治平後至靖康凡二百八十
卷進淳熙九年知遂寧府又以累次所爲重別寫
進共九百八十卷其修換事總爲目十卷又別爲
舉要六十八卷并卷總目五卷通計一千一十三
卷今本所存乃建隆至治平五朝之事餘皆失傳
其書倣溫公舊規爲之然謙抑不敢竟名續通鑑
但謂續長編長編者通鑑之初槩也詳見通考及

讀書附志又按是編在宋時傳本已有詳畧不同
又逐卷自分子卷故此一百八卷趙作一百七十
五卷陳振孫作一百六十八卷所載未能盡符近
世朱彝尊跋云宋儒史學以文簡爲第一蓋自司
馬君實歐陽永叔書成猶有非之者獨文簡免于
譏駁張敬夫比之霜松雪栢生死文字間葉正則
謂春秋之後纔有此書要非過論也治平以後賴
有長編紀事本末存畧見大旨然觀之者罕矣陳
氏桎王氏宗沐薛氏應旂目不見是書輒續通鑑
行世柯氏維騏王氏維儉之改修宋史亦然此猶

夏蟲不可以語冰松柏之鼠不可語以堂密之有
美樅者也

續宋編年資治通鑑十八卷

知不足齋寫本

右前人撰此書諸著錄家無之惟見于焦氏經籍
志所載自建隆迄靖康止疑卽長編之舉要也但
卷數相懸又不署舉要之名無序跋可證俟再考

三朝北盟會編二百五十卷

開萬樓藏刊本

右宋朝議大夫充荆湖北路安撫司叅議官徐夢
莘輯彙諸家所紀事以年月日編之上帙起政和
七年七月終宣和七年十二月中帙起宣和七年

十二月終靖康二年四月下帙起建炎元年五月
終紹興三十二年四月○按此編後尙有集補五
十卷今未見

元史續編十六卷

寫本

右明楚府右長史山陰胡粹中撰踵朱子綱目體
爲之有永樂元年自序

洪武聖政記十二卷

開萬樓寫本

右書與實錄體相近但不著撰人姓名按千頃堂
目載有宋濂洪武聖政記二卷凡七類與此書體
旣不合又載趙琦美有洪武聖政記三十二卷唐

志大有高廟聖政記二十四卷與此卷亦不符未詳孰是

昭代典則二十卷 刊本

右明尚書晉江黃光昇撰所載起太祖迄世宗朝事以下二種俱仿綱目體

國史紀聞十二卷 刊本

右明贈兵部尚書沁水張銓撰此書義例謹嚴自序謂國初迄嘉隆間野史雜出數十家或誕而失真或畧而不備惟吾學編事核言簡惟時有避忌方技佞倖諸傳廢而不錄未免挂漏而體非編年

於兼綜條貫之義闕如因討論舊章悉取諸書參校異同是是非非不敢違匹夫匹婦之公云所載事至正德六年止書為門人徐揚光校刊

憲章錄四十六卷 刊本

右明薛應旂撰所載起洪武元年迄正德十六年事以下五種俱編年體

皇明大政纂要二十四冊 千頃堂書目 寫本 作六十三卷

右明茶陵譚希思撰所載起洪武迄嘉靖間事

皇明通紀述遺十二卷 刊本

右明秀水卜世昌撰所載起元至正十一年迄明

隆慶六年事

嘉隆兩朝聞見紀十二卷 刊本

右明監察御史沈越撰越南京錦衣衛人以諸家所述如憲章錄及王世貞國朝紀要鄭曉吾學編之類皆斷手於武廟故續取世宗穆宗朝事彙次之

兩朝憲章錄二十卷 刊本

右明光州訓導吳瑞登撰亦載世穆兩朝事專以踵薛氏之書而作

別史類

晉記六十四卷 寫本

右國朝舉人蕭山郭倫撰初倫祖任之嘗爲晉書摘謬二卷倫習聞其說又嘗讀荀勗傳見高貴鄉公欲爲變一語以爲大悖於理以君欲誅臣而曰爲變則倫常汨矣因悉取原書刪正之以成祖志且謂原書蕪謬甚多約舉其失如宣景文及身不帝而列諸本紀諸助亂孫旂牽秀之徒附見足矣而反與繆播閻鼎同類列之其賈充姚萇傳傳鬼神事竟如優俳者之所爲諸國載紀不年不月複襍無章北魏雖有本史自力微通貢猗盧封代

以至道武稱帝百十五年之間皆有當時戰伐之事譙登許肅忠義之臣皆闕而不書潘岳諸人之文無關治亂之數而盡臚之本傳又如武帝平吳混一區夏其間謀臣碩士如華祐預濬琨逃導侃嶠安之謨猷經畧至今猶想見其人而本傳蕪冗曾不足以發其不可磨之概至清言娓娓司馬氏所以亂亡者而縷述之不衰是皆取舍失衷是非眷亂倫今所定論事必達其要記言必覈其實於詳畧分合間多更易舊文凡六十四卷爲世系一爲本紀三爲內紀一爲列傳三十四爲十六國錄

十二

北燕併後燕故雖增代仍爲十六國

爲志入舊志一

律呂

隆平集二十卷

刊本

右宋中書舍人南豐曾鞏撰晁公武日記五朝君臣事跡蓋謂藝祖至英宗也其書仿正史紀傳體爲之

東都事畧一百三十卷

刊本

右宋承議郎知龍州眉山王偁撰進本趙希弁曰書分本紀十二世家五列傳一百五附錄八間爲讚論以發揚之以其國都大梁以前之事故謂之東都然其中疎駁甚多按趙雖云然然後世欲考

汴宋文獻亦藉以有徵焉

宋大事記講義二十三卷 寫本

右宋教授溫陵呂中撰所紀亦皆北宋事分類為編各加論焉

宋史新編二百卷 刊本

右明主事莆田柯維騏撰會宋遼金三史為一以宋為正統遼金附焉升瀛國公益衛二王於帝紀以存統正亡國諸叛臣之名以明倫列道學於循吏之前以尊儒皆維騏之特見其書歷二十載而成詳見朱彝尊跋

南宋書增削定本六十卷 知不足齋寫本

右明大學士嘉善錢士升輯亦以宋史失之繁雜故取南渡後各朝事重為更定有太學生許重熙為贊

大金國志四十卷 開萬樓寫本

右宋宇文懋昭撰懋昭嘗仕於金為淮西歸正人宋改授承事郎工部架閣其書於端平元年表上所志起金太祖至宣宗凡一百七十年事

契丹國志二十七卷 知不足齋寫本

右宋秘書丞嘉興葉隆禮撰述契丹自阿保機初

興迄於天祚凡二百餘載之事畧仿紀傳體前有
遼國始興本末九主年譜末附宋臣紀錄諸蕃國
雜記歲時雜記等種於淳熙七年表上錢曾稱是
書謹嚴詳贍有良史之風

金志一冊 寫本

遼志一冊 寫本

右二書約述金遼興廢本末及歲時風俗事畧當
是後人從大金國志契丹國志兩編中抄撮而成
故仍署懋昭隆禮二人之名也

續宏簡錄四十二卷 刊本

右 國朝少詹事仁和邵遠平撰一名元史續編
遠平之高祖經邦曾爲宏簡錄以續鄭樵通志所
載自唐迄遼金止遠平因取元史刪繁訂誤兼採
諸家所著補其缺畧成此編以續祖書朱彝尊爲
之序

皇明書四十五卷 刊本

右明鄧元錫撰黃虞稷曰輯洪武至嘉靖十一朝
君臣事蹟蓋仿正史體爲之

皇明史竊一百七卷 刊本

右明新昌知縣東莞尹守衡撰黃虞稷曰書分帝

紀八卷志六卷世家十卷列傳八十三卷其高后
紀百官志田賦志河漕志四卷原缺

識大錄五十二冊 開萬樓寫本

右明宣城劉振撰亦仿正史例所載起太祖迄穆
宗朝事

明書一百七十二卷 刊本

右 國朝尚書靈壽傅維鱗撰自序謂搜求明興
以來行藏印鈔諸本與家乘文集碑志得三百餘
部九千餘卷參互實錄考訂異同纂成此書起元
天歷元年戊辰迄明崇正十七年甲申於萬歷以

前釐然詳備泰昌而後故牒散失多有缺畧述本
紀宮闈紀表志記世家列傳凡七十七目合一百
七十二卷

霸史類

七國考六冊 寫本

右明烏程董說撰取羣籍所載戰國時七國之事
彙錄而分系之每國為十四考首職官終瑣事

吳越紀餘五卷 知不足齋寫本

右明長洲錢貴撰述春秋時吳越事自識云撫其
大綱為三首復擬其事之可信者為三十五首又

未附雜咏十餘題蓋皆取材史籍而以己意融裁之者

華陽國志十二卷 寫本

右志本晉常璩撰華陽梁州地也其書紀漢以來巴蜀人物今本爲宋知成都府李季叔就璩原編更取各史訂正缺譌重加編次者

蜀鑑十卷 刊本

右宋李子文撰記蜀事自周秦間至宋平孟昶止

蜀國春秋十八卷 刊本

右明成都苟廷詔輯紀蜀事自蜀山氏開國迄明

代止後附郡縣通釋詳其沿革焉

十六國年表一冊 開萬樓寫本

右明武陵孔尚質輯取兩晉間十六國事分國分年而載之非縱橫列格之表也

後梁春秋二卷 刊本

右明海鹽姚士粦輯以蕭詧乃昭明第三子梁之嫡系宜有史書故次其三十三年之事爲專編焉

晉列國指掌二卷 寫本

唐藩鎮指掌二卷 寫本

右明眉山張大齡撰晉之十六國及唐末河北諸

鎮事蹟散在史冊往往不得要領觀此則興廢本末犁然在目矣

五國故事二卷 天一閣寫本

右紀吳楊行密南唐李昇蜀王建孟知祥漢劉巖
閩王審知五國軼事不著撰人姓氏吳焯跋云編
中稱劉爲彭城考吳越備史凡劉皆稱彭城避武
肅諱也則此或亦吳越人所爲

吳越備史四卷補遺一卷 瓶花齋寫本

右載通考者有二吳越備史九卷注吳越掌書記
范垌林禹撰又吳越備史遺事五卷注全州觀察

使錢儼撰并引陳振孫言謂備史亦儼所爲託名
林范者而今本則有吳焯跋云嘗得吳越二十四
世孫受徵刊本與此校對其刊本小傳頗有刪節
則此鈔本爲當時林范原撰亦未可定又據刊本
武肅王二卷文穆王忠獻王吳越國王各一卷凡
五卷其備遺一卷云是越中比部德洪所纂則此
前四卷當作五卷鈔本標題誤耳
三楚新錄三卷 瓶花齋寫本
右宋秘書省校書郎周羽冲撰錄馬希範周行逢
高季興始末各爲一卷

蜀檮杌三卷

晁志及通考俱作外史檮杌十卷

寫本

右宋屯田員外郎張唐英撰以王建孟知祥父子四世凡八十年比之公孫述輩在蜀最為久遠因取其本末編年次之自序謂凡五代史皇朝日歷所載者皆畧而不書有治平間陸昭迴跋

江表志三卷

瓶花齋寫本

右宋兵部郎中福州鄭文寶撰志南唐三主事各為一卷晁氏謂此書雜記如事實之類蓋不以年月為編也按文寶本南唐人陳氏唐餘紀傳列諸義行後入宋舉進士因仕焉

江南野史十卷

曝書亭寫本

右宋螺川龍衮撰亦載南唐三主及三十一臣之事仿紀傳體為之朱彝尊跋曰江南野史鄭樵通志載有二十卷此本止錄十卷當再於別志審之今按宋史及晁志俱作二十卷共八十四傳則所傳似非足本也

南唐書三十卷

刊本

右宋陽羨馬令撰序言其祖太博元康世家金陵多知南唐故事未及撰次令纂先志而成之其書亦仿紀傳體所載較備

唐餘紀傳二十四卷 瓶花齋寫本

右明刑科給事中吳興陳霆輯以李昇為憲宗之裔比蜀之昭烈梁之蕭詵故曰唐餘書分國紀三卷列傳十九卷志畧附錄各一卷

十國春秋一百十四卷 刊本

右國朝檢討仁和吳任臣輯以補歐史十國世家所未備為紀二十世家二十二列傳一千二百八十二又為紀元世系地里藩鎮百官五表五季遺文軼事惟此及朱彝尊五代史注搜采最詳此已刊而朱注藁終於未就惜哉

明氏實錄一卷 倦圃寫本

右明新都楊學可撰叙夏國明玉珍兩世始末起至正辛丑迄洪武辛亥凡十一年事

雜史類

歷代小史一百五卷 刊本

右明河南道御史豐城李栻輯錄路史而下至明代諸家所紀凡一百五種種各一卷皆節其文者

邃古記八卷 刊本

右明朱謀瑋輯記古初逸事采摘諸書為之

考定竹書十三卷 刊本

右國朝仁和孫之騷輯以竹書紀年中有錯失
乃考據他書所載更爲釐定詳注以補沈約舊注
之缺

晉史乘一卷楚史檇杙一卷

刊本

右元吾邱衍撰此僞書也簡端有衍叙云近得二
書不著姓名與晏子春秋相似疑出一時蓋假託
之詞實衍所造耳

後漢書年表十卷

開萬樓寫本

右宋廸功郎權澧州司戶參軍熊方撰以范史無
表故補作同姓王侯表二異姓諸侯表六百官表

分上下各二乃思陵朝經進本朱彝尊謂此編宜
附刻范史後以成一代完書

漢唐秘史六卷

寫本

右明寧王權輯考漢唐史內帝王政治之本末而
編次之自序謂承太祖命而作有弟安王楹跋

三國紀年一卷

天一閣寫本

右宋永康陳亮撰前有目錄列宗室外戚至高士
列女凡十一目而下止有三國各君臣論贊並無
紀年事實蓋所缺甚多矣

三國雜事二卷

天一閣寫本

右宋提舉常平丹徒唐庚撰亦係論斷三國事分
條雜辨非纂次其實蹟始末也

大唐創業起居注三卷 刊本

右唐溫大雅撰紀唐高祖起義至受禪凡三百五
十七日事

貞觀政要十卷 刊本

右唐學士浚儀吳兢撰晁志云兢以唐之極治貞
觀爲最故採時政之可備勸戒者上之於朝凡四
十篇

東觀奏記三卷 天一閣寫本

右唐右補闕裴庭裕撰記宣宗朝事凡八十九條
蓋當時詔修實錄故庭裕爲此以奏記於史閣者
唐闕史二卷 寫本

右唐高彥休撰亦記大中以後事凡五十一篇

大唐傳載一卷 天一閣寫本

右雜記唐事書不署名按唐藝文志有林思傳載
一卷當卽此

南部新書十卷 知不足齋寫本

右宋員外郎錢希白撰雜記唐代故事按此書傳
本多寡不一晁志祇作五卷又嘗見別本載有元

子真子跋謂以蜀本相對此有者彼無彼有者此無因深以爲疑又清隱老人跋則言原序作三萬五千言事實若干列卷十今本止一萬五千言事實二百五十有七亦列卷十所以子真子跋云云因取曾公類說所收者摘鈔事實五十一條以作補遺而近時吳焯跋則云余所藏高承埏舊本較多於此三倍卽補遺諸條咸在計件繫之事凡八百數十則今鮑氏所藏正與吳跋相符自甲至癸凡十集蓋完書也

中朝故事二卷 寫本

右後唐尉遲偓撰晁志云記唐懿昭哀三朝故事故曰中朝

五代史補五卷 曝書亭寫本

右宋潯陽陶岳撰補錄五代軼事每代爲一卷凡一百七條

五代史闕文一卷 寫本

右宋翰林學士鉅野王禹偁撰晁公武曰錄五代史筆避嫌漏畧者以備闕文凡一十七事

龍川別志以卷 寫本

右宋蘇轍撰錄宋初至慶歷間雜事蓋居龍川時

所作

涑水紀聞二卷

知不足齋寫本

右宋溫國公司馬光撰晁云記賓客所談祖宗朝及當時雜事按通考作十卷今本乃後人所併

甲申雜錄一卷

聞見近錄一卷

隨手雜錄一卷

俱寫本

右宋宗正丞王鞏撰鞏文正公孫也所記皆宋初故事有靖康甲寅淮海張邦基跋按此書初未顯鞏有從曾孫名從謹者於隆慶改元得於向氏因

而傳之復從吳一能校本補鈔甲申見聞二錄內所缺二十六條附焉皆見從謹跋

宋紀受終考三卷

刊本

右明新安程敏政撰歷引各書以明宋太祖太宗受終之正而力闢燭影斧聲為誣說云

四明尊堯集十一卷

刊本

右宋司諫延平陳瓘撰專辨王安石目錄之誣僭而作朱子嘗剖論之詳見通考

宋宰輔編年錄二十卷

知不足齋寫本

右宋太常博士徐自明撰取宋代輔臣事編年次

之起建隆迄嘉定間止

宋西事案二卷 刊本

右錄宋禦元昊事並諸臣經畧等疏今本不署名
考黃氏書目作張鼎傳是樓書目作祁承燦姑兩
存之

錢氏私誌一冊 天一閣寫本

右宋廸功郎錢世昭撰自謂叔父太尉昭陵之甥
親見宣政太平文物之懿其在帝左右銜命出疆
凡耳目所接皆能廣記而備言因請其說得數萬
言叙而集之按太尉者錢恂也敏求記遂以此書

直署恂名誤矣

宜齋野乘一卷 天一閣寫本

右宋江陰吳枋撰隨手劄記時事先成十餘卷燬
於火後乃追記一二錄此自序云

湘山野錄三卷續錄一卷 天一閣寫本

右宋餘杭僧文瑩撰晁志云記國朝故事

玉壺清話十卷 天一閣寫本

右前人撰元豐戊午自序謂收得國初至熙寧中
文集數千卷其間神道墓誌行狀實錄奏議之類
輯其事成一家言玉壺隱居潭名也按此書明時

止傳五卷吳人吳岫訪得後五卷四明范欽又從岫借鈔成完書吳范各有跋見今本其前八卷皆雜記九卷爲李先主傳十卷爲江南遺事

清溪弄兵錄一冊 天一閣寫本

右宋王彌大輯記清溪方臘事迹前半從方勺泊宅編中錄出後半從國續會要中錄出兩存之以備參考嘉泰改元自序云

靖康要錄三冊 通考作五卷今不分 寫本

右本名孝慈淵聖皇帝要錄所記自元符三年欽宗誕生至南渡高宗卽位之日止向無撰人故陳

振孫已云不知誰作今按末條云五月一日今上卽位則當是高宗時人也

靖康紀聞一冊又紀聞拾遺一卷 寫本

右宋太學生武陵丁特起撰疑卽孤臣泣血錄也

靖康蒙塵錄一卷 天一閣寫本

右不署名以上二種皆記徽欽事

北狩見聞錄一卷 瓶花齋寫本

右宋太尉曹勛撰乃扈從二帝北狩時所紀時勛爲保信軍承宣使知閣門事故本書列銜如此

北狩行錄一卷 寫本

右書通考作蔡條王若冲二人撰他處或止署條名亦記徽宗事

南燼紀聞一冊 瓶花齋寫本

右宋淮海周輝撰起自靖康元年正月金人臨汴以至二帝往五國城而止編年編日所紀頗詳然此書他處或不署名前人有疑其僞者則以徐夢莘北盟會編所列書目中無之而晁志陳錄均不載也存以俟考

建炎時政記三卷 天一閣寫本

右宋尙書李綱撰趙希弁曰所編自建炎元年五

月一日至於八月十八日事

建炎維揚錄一卷 天一閣寫本

右記渡江時事按通考有無名氏戊申維揚錄一卷或卽此戊申者建炎二年也

建炎復辟記一卷 寫本

右記苗劉作亂隆祐太后臨朝及後復辟並平定始末似爲韓世忠作通考亦曰無名氏

竊憤錄一冊 寫本

右宋安撫使辛棄疾撰

南渡錄一冊 寫本

右不署名或亦作辛棄疾撰以上二書皆記靖康
紹興間事但多未可信前人嘗論之

美芹十論一冊 寫本

右前人撰乃當時進獻守禦之策

中興禦侮錄二卷 二老閣寫本

右不署名記宋將吳璘劉錡與金用兵事

順昌戰勝錄一卷 寫本

右記紹興十年宋劉錡破金兵於順昌事按通考
有順昌錄一卷又有順昌破敵錄一卷皆不著撰
人而今本則署楊汝翼名未知是否

采石瓜洲斃亮記一冊 寫本

右記宋紹興辛巳尚書虞允文敗金兵於采石瓜
洲間事為虞門人宣教郎潼川蹇駒所編

曲洧舊聞十卷 寫本

右宋直秘閣新安朱弁撰弁為朱子從父建炎丁
未使金留十七年乃歸王明清謂此書事多出晁
氏世頗傳之蓋弁本晁堦所紀當時事蹟凡二百
九十餘條

松漠紀聞二卷 寫本

右宋徽猷閣直學士番陽洪皓撰陳振孫曰皓奉

使留虜中錄所聞雜事

紹興正論一卷 寫本

右書據馬端臨云序稱瀟湘野夫不著名氏錄文武官不附和議及忤秦檜得罪者

東南防守利便三卷 錢塘趙氏小山堂寫本

右宋江南東路安撫使呂祉撰進實其屬吳若陳克二人所爲其狀畧云臣自到建康哀集方策所載山川險阻道里遠近軍馬屯戍之地爭戰勝敗之事作東南利害總論以襄陽江陵武昌九江皆建康上游上下之勢要在相接作江流上下論北

則合肥壽春盱眙廣陵上下皆其表也表裏又當如一作江淮表裏論今圖恢復必據要會以爲根本建康實中興根本之地作建康根本論自六朝建都以來沿江戍守城池宮室郊廟河渠事蹟悉以類舉南北之事盡此矣

燉煌新錄一卷 寫本

右書陳振孫曰有序稱天成四年沙州傳舍集而不著名氏蓋當時奉使者叙張義潮本末及彼土風物甚詳按義潮使金九年始歸所稱天成疑作天德蓋金主亮年號也

襄陽守城錄一冊 知不足齋寫本

右宋趙萬年撰開禧二年金以二十萬兵圍襄陽都統趙淳固守得保萬年時為幕客紀其事皆史所不載

辛巳泣斬錄一卷 汲古閣寫本

右宋蘄州司理趙與袞撰嘉定十四年蘄為金陷時與袞暨同官力守不保既脫生因叙其始末且云欲觀者知蘄之陷非郡官士民無備之患實為援兵之所誤末附壬午袞贈卹典

四朝聞見錄五卷 小山堂寫本

右宋龍泉葉紹翁撰錄高孝光寧四朝雜事自甲至戊凡五集

金人弔伐錄二卷 寫本

右不著撰人黃虞稷日記金人伐宋往來文檄盟誓書

錢塘遺事十卷 開萬樓寫本

右宋武陵劉一清撰皆南宋雜事

廣王衛王本末一卷 寫本

右宋兵部侍郎陳仲微從二王入廣目擊當時情事而錄之後仲微沒於安南元時安南入覲言及

仲微事因傳其書首尾有元人無名氏二跋云
歸潛志八卷 天一閣寫本

右金渾源劉祁撰錢曾曰劉京叔以布衣遨遊士
大夫間為遺山諸公所推築堂曰歸潛因以名其
書所記多金源逸事後之修史者足徵焉按此書
足本有十四卷

南遷錄一冊 汲古閣寫本

右記金大定間自燕遷汴事相傳金著作郎張師
顏撰據大德間浦元玠跋稱較金國志所載事語
同而年號殊或當以此為正然其中實有可疑故

陳振孫及趙與時賓退錄皆力辨其偽諒非信史
也

遼小史一冊 刊本

金小史一冊 刊本

右明禮部主事吳縣楊循吉撰約遼三世九十年
之事為一篇文止八千餘言其述金者亦僅四倍
之而首尾百餘年之事具焉以帙少故名小史其
實所舉皆大綱非雜綴瑣事者比

遼金大臣年表二卷 寫本

右未詳撰人遼金各一卷表年於上而以諸臣名

爵緯列其下以資檢考

皇元聖武親征記一卷 寫本

右不著撰人紀元太祖誕生時起及在位一十二年
年中出征始末

平宋錄三卷 寫本

右元杭州路司獄官燕山平慶安撰記伯顏平宋
事蹟有大德間鄧鑄方回周明三序按千頃堂書
目載此作劉敏中撰未詳何據

平獯記一卷 寫本

右元學士虞集撰記萬戶章伯顏平粵西獯洞事

至元元年作

保越錄一卷 寫本

右紀元至正間樞密院副使呂珍守紹興事黃虞
稷謂係張士誠幕客所作

庚申外史二卷 天一閣寫本

右紀元順帝三十六年之事卷首並錄二序其一
無名氏序謂葛溪先生姓權名衡吉安人隱德研
學之士著書甚多洪武辛亥偶在船中相見因閱
此錄遂廣其傳其一名廸簡者 不著姓 序自謂洪武
二年受命訪求史事赴沐梁有名忠之者能言二

十年來朝野事與之極論數晝夜又以昔所聞知
庚申帝元統以來十五六年之事總前後凡三十
六年事筆於書號曰庚申大事紀據二序所言不
同如此而明史及千頃堂目俱直作權衡今仍兩
存之以俟知者考定焉

高廟紀事本末八冊

開萬樓寫本

右不著撰人仿通鑑紀事本末例載明祖事實頗
詳

高皇后傳一冊

刊本

右明仁孝皇后撰永樂間曾頒賜諸王及百官

國初事蹟一卷

刊本

右明禮部侍郎金華劉辰撰述明祖開創時事乃

永樂時經進本

秘閣元龜政要十六冊

小山堂寫本

右亦紀太祖朝事其書流傳頗少撰人無考疑亦
當時勅修者

國初禮賢錄一冊

寫本

右紀明劉基葉琛章溢宋濂四人被徵及一時恩
遇之榮書爲基所述

北平錄一冊

寫本

右紀洪武間北征沙漠事

平蜀記一冊 寫本

右紀洪武四年平蜀事以上二書皆不著撰人

剪勝埜聞三卷 寫本

右明徐正卿撰雜記明祖發祥始末并其時軼事

賢識錄一冊 刊本

右明翰林侍讀崑山陸鉞撰亦多追述洪武間舊事

皇明定保錄二冊 寫本

右明無錫趙元祉撰上冊紀太祖諭訓下冊紀成

祖諭訓各分九類

革除脩遺錄一冊 寫本

右明御史新淦張芹撰本宋端儀之革除錄取建文帝時忠於所事者四十六人次其行事事無考者則存姓氏爵里於後焉

拾遺書一冊 寫本

右明蒲陽林塾輯正德乙亥自識云革除之人前史失書予始考郡志與少保李文達拾遺四十二人近又見僉事宋端儀御史張芹增入江右數人行實復得十二人共五十有四人

姜氏秘史一冊 寫本

右明尚寶少卿弋陽姜清撰黃虞稷曰倣實錄編年法記建文事諸臣附見焉

革除遺事六卷 寫本

右明黃佐輯亦本宋張所錄而增廣之者有正德庚辰自序

革朝遺忠錄二卷 刊本

右明嘉興郁袞輯亦據宋張二錄并何孟春續錄而彙次之者

革除遺事十六卷 寫本

右明黃巖符驗輯嘉靖癸卯自識云泰泉先生出橋李郁氏本相示俾予覈往牒以正其訛漏予故考定為十六卷以復于泰泉云按此編視黃郁二家所載加詳有郁袞跋

革除逸史二卷 刊本

右明朱睦㮮撰千頃堂目載有遼國記二卷當即此

革除編年一冊 寫本

右不署人據浙江通志作嘉善袁仁撰以上二種皆分年紀事

建文朝野彙編二十卷 刊本

右明山東副使秀水屠叔方輯悉取諸家所記以年編之述建文事此為最詳按叔方嘗為鄱陽令先是遜國諸臣疎屬一丁一地分戍劇邊一遇絕丁輒行勾補飛符嚴急不勝擾方在鄱適有符勾鄱人胡閏絕丁者慨然曰彼死忠何罪其親屬又何罪使吾有言責必碎首爭之矣比擢御史即具疏請諡請祠請修治塚墓卹錄子孫及交遊姻黨之株累編成者悉寬宥之神宗感動張榜大赦一千六百餘人方後歸田乃輯是編事見檇李詩繫

建文書法儼一冊 刊本

右明諸生東吳朱鷺撰分三編前編為太祖本紀起洪武十年建文帝誕生迄三十六年正編為建文帝紀凡四年皆仿綱目體大書分注附編雜錄諸家之論并為忠臣譜錄三百八十餘人

忠節錄六卷 刊本

右明鴻臚卿海州張朝瑞輯取建文之臣人各為傳亦取材於諸家者後有考誤一卷

懷忠錄七卷 寫本

右明莆田鄭應旂撰以革朝死事諸臣彙括其事

為詩歌後附遺忠列傳四十篇

皇明表忠記十卷 刊本

右明錢士升撰凡忠於建文者為傳八卷又為三不忠傳一卷則李景隆茹常陳瑛也凡例云留芳遺臭合之而勸懲之義始備末卷曰正譌則辨致身錄從亡隨筆等書之偽

遜國忠記十八卷 刊本

右明周鏞撰亦分人立傳謂紀遜國事之書幾二十種擇其近可信者存之楊廷樞為序

奉天靖難記四卷 寫本

靖難功臣錄一冊 寫本

右二書紀成祖靖難及翊戴諸臣事皆不著撰人黃虞稷謂奉天記語多誣偽

立齋閑錄三卷 寫本

右明閩中宋端儀撰條記故事自明初迄宣德間

止

平定交南錄一卷 寫本

右明邱濬撰記定興忠烈王張輔平安南事

正統臨戎錄一冊 寫本

右明指揮使楊銘撰以下四書皆記英宗北狩事

否泰錄一卷 寫本

右明侍郎承新劉定之撰說見上

出使錄一卷 寫本

右明給事中李實撰或作使北錄

北征事蹟一冊 寫本

右明錦衣指揮同知新昌袁彬撰乃纂修實錄時

經進本千頃堂月云一作尹直著

復辟錄一卷 寫本

右明豐城楊瑄撰記景泰八年英宗自南內復辟
事後附記石徐諸人之敗

成憲錄十一卷 寫本

右書與實錄體相類紀洪武迄天順間朝章政蹟
撰人無考其卷帙或不止此也

天順日錄一冊 刊本

右明大學士定遠李賢撰所錄多時政亦有近說

家處

古穰雜錄三卷 寫本

右前人撰亦雜記時事而間及理學語

雙槐歲鈔十卷 寫本

右明長樂知縣香山黃瑜撰黃虞稷謂此書記洪

武迄成化中事凡二百二十餘條後瑜孫佐掌南
京翰林院事時於院中得吳元年故簡足成之

可齋筆記一冊 寫本

右明大學士彭時撰多自記在館閣時事

南征錄一卷 寫本

右明布政使江浦張瑄撰瑄於天順間征兩廣苗
蠻每營中稍隙掌記一日行事與所見聞履歷因
成此錄

聞見類纂小史十四卷 寫本

右明訓導鄞縣魏偁撰分內外篇劄記時事各以

類從自謂所載與筆談揮塵錄程史等書相仿

皇明政要二十卷 刊本

右明成都府訓導婁諒撰畧仿貞觀政要體紀洪
武迄成化政蹟凡四十篇其子兵部郎中性於宏

治間表進

治世餘聞二卷 寫本

繼世紀聞五卷 寫本

右明陳洪謨撰每卷首注箬陂二字當卽洪謨號
也前書記宏治間事後書紀正德間事

蹇齋瑣綴錄八卷 寫本

右明大學士尹直撰雜綴朝野事有正德丁卯自序

損齋備忘錄二卷 寫本

右明中都留守梅純撰純南京孝陵衛人所記關涉掌故為多間有辨證詩文經史者

平番始末二卷 寫本

右明太常卿靈寶許誥追述其父進於宏治間征勦西域方畧書於嘉靖九年奏進

視草餘錄二卷 刊本

右明大學士新都楊廷和自記在內閣時事乃歸

田後所述

雙溪雜記一冊 刊本

右明尚書晉溪王瓊撰記洪武至正德間事并加論斷焉

皇明傳信錄七卷 寫本

右多述明代軼事之有關係者不署撰人所錄至武宗末年而止

皇明紀畧四卷 刊本

右明吳郡皇甫錄撰皆雜記朝事

明良集七卷 刊本

右集凡五種宋濂聖政記一卷金幼孜北征錄一卷楊士奇聖諭錄三卷李賢天順日錄一卷李東陽燕對錄一卷乃禮部尚書南海霍韜所彙

今獻彙言八冊 刊本

右明高鳴鳳輯諸家雜記朝野事者凡二十五種始陸鈺賢識錄終王文祿竹下寤言

皇明小史三十二卷 寫本

右集明人紀明事者凡四十六種未詳何人所編紀錄彙編二百十六卷 刊本

右明侍郎烏程沈節甫輯前列明帝御製碑記等

八種又博採各家著述百三十種而彙編之明代稗乘此為搜羅最富雖間有小說家言要以有關掌故時事者為多故列於史

九朝談纂十冊 天一閣寫本

右不知何人所纂九朝者洪武至正德也其所取材如西樵野紀蓬軒類記前聞記龍江夢餘錄中州野錄蜩笑稿庚巳編之類凡五十二種有書目列於前

枝山野紀四卷 寫本

右明祝允明撰多記遺軼事明史藝文志載允明

九朝野紀四卷當卽此

館閣漫錄三冊 天一閣寫本

右明左諭德山陰張元忭撰自永樂迄正德以年

月爲次所錄皆朝政之大者此書有刊本分十卷

瀛澨談苑十二卷 天一閣寫本

右紀洪永至正嘉朝章典故以類爲次題曰鈞瀛

子不著名

徵吾錄二卷 刊本

右明鄭曉撰取明代大事分條述之凡三十一篇

馬端肅公三紀三卷 刊本

右明尙書鈞陽馬文升撰正德中陶瑛序云馬端

肅奇勲不可一二數若平石城撫遼陽復哈密其

尤著也乃摭三事始末而自爲之紀

穀山筆塵十八卷 刊本

右明大學士東阿于慎行撰亦間及詩文雜類而

有關史事爲多

安楚錄十卷 刊本

右載明正德間湖廣巡撫秦金平定孺寇并治楚

事蹟乃其孫柱所輯錄者

世廟識餘錄二十六卷 刊本

右明尚書徐學謨輯紀嘉靖朝事頗詳

閣諭錄四卷 寫本

右明大學士楊一清撰自錄嘉靖間在閣時題奏

諸事

諭對錄三十四卷勅諭錄一卷詩賦錄一卷 刊本

右明大學士張孚敬自錄嘉靖間所奉勅諭并名

對諸事末一種則賜詩和韻等作也

南城名對錄一冊 寫本

右明大學士李時自記嘉靖入相時名對語

南內記一冊 刊本

右明嘉靖間有布衣曾入南內因記其所歷不著名

南奉使集二卷 刊本

北奉使集一卷 刊本

右明唐順之撰一紀奉使舟山撫勦倭寇事一紀奉使薊鎮設官操練防禦事皆順之以郎官出使

時所作

遼紀一冊 寫本

右明錢塘田汝成撰取自洪武二年始置遼東衛迄嘉靖十八年事挈綱列目而書之

平黔三紀一冊 刊本

右紀洪武壬子正統己未嘉靖甲子三次平黔之事起曰黔蒼山人考黃氏書目作趙汝謙撰

雲中紀變二冊 寫本

右明僉事東孫允中撰紀嘉靖甲申大同兵變始末

甲乙倭變二卷 寫本

右明侍郎華亭張鼎撰紀嘉靖間江浙倭寇事畧乃萬歷時經進者

土魯番哈密始末一卷 寫本

右紀嘉靖正德間經畧事蹟不著撰人

平吳凱旋錄四卷 刊本

右明諸生定海朱澤撰錄嘉靖庚子平崇明寇秦璠黃良等始末而以紀功詩文附焉

欽定平夷功次一冊 寫本

右明嘉靖三十四年平定四川宜賓縣蠻寇叙功以按察使僉事焦希程為最希程因錄其事蹟并賞罰差等為此

張岨嶧定變錄一冊 刊本

右紀明兵部尚書張佳允定浙西兵變及滑縣大

盜等凡六事爲盧柟諸人先後所述而按察副使許岳彙錄之者

平壤錄五卷 刊本

右明會稽諸葛元聲撰錄隆萬兩朝間先後平俺荅平都蠻平寧夏平日本平播州之事各系以贊商濟謂其事核詞嚴庶幾實錄

經畧復國要編十四卷 刊本

右明兵部侍郎宋應昌撰萬歷三年倭寇陷沒朝鮮其王李昫上疏乞援時應昌奉命經畧事既竣因錄其疏咨檄諭等件而彙存之

龍憑紀畧一卷 刊本

右紀明粵西副使翁萬達戡定土夷韋應李寰趙楷三人事爲田汝成撰

南泰紀畧一冊藤峽紀畧一冊 刊本

右皆載廣西平徭始末蔚州尹耕所紀并爲之論交黎事畧五卷 刊本

右明按察副使麻城方民悅撰記陳瑄勦撫安南事

平倭四疏三卷 刊本

右明僉都御史吳郡章煥先後所陳平倭方畧皆

於嘉靖間奏進者

征蠻紀畧二卷 刊本

右明萬歷間後軍都督同知王尙文征勦廣西十

寨事畧為尙文所自記

處苗近事一冊 刊本

右載明代湖廣貴州諸省撫苗之事副使李愷所

錄

嶺南客對一卷 寫本

右題曰粵西舜山子撰不著名設為問答一篇備

言招撫粵中苗蠻措置事宜

國史考異六卷 曝書亭寫本

右不著撰人取明代實錄所載與諸家稗乘所紀

事蹟有異同者摘其原文分條考證之此書詞核

而義顯中有引及明季人說者疑所譔不止此今

止洪永兩朝之事而已識以俟考

孤樹哀談十卷 刊本

右明鹽運使安成趙與可輯所哀錄凡三十一家

野史之言以時代次之始太祖迄武宗張仁浹曰

此書所述事蹟有未可盡信處

萬歷野獲編三十卷 寫本

右明舉人秀水沈德符撰德符家世仕宦習聞國
家掌故且及見嘉靖間名流遺獻講求故事網羅
放失勒成一家言朱彝尊謂其事有左證論無偏
黨明代野史未有過焉者

貽清堂日鈔一冊

寫本

右明仁和錢養廉撰皆記隆萬以後時事凡百三
十番每條上方標以硃字分箴銘模楷瑕疵隆遇
賾記分定紀異覆鑿辨誣等門亦間有刪潤處蓋
養廉手藁雖非清本其先後可以意重編之也養
廉萬歷己丑進士會典山東試後落職其書持論

最平筆頗修飭惜罕有傳之者

見聞雜記三卷

刊本

右明吳興李樂撰前一卷從董漸川古今粹言及
鄭端簡今言中錄出後二卷乃自記所聞

聞見錄一冊

寫本

右明金陵姚宣撰亦雜記時事

棗林雜俎五冊

寫本

右明海寧談遷撰遷會撰國權一百卷復以紀述
所不盡者爲此凡十三門曰科牘曰藝文曰彤管
曰空元曰炯鑒曰名勝曰營建曰器用曰榮植曰

蹟動曰幽冥曰梵贅曰逸典

耳鈔秘錄一冊 寫本

右雜錄明代朝宇軼事署曰楚東無名子述

燕山叢錄二十二卷 刊本

右明刑部郎常熟徐昌祚撰皆四方見聞實事每卷爲一類自敦行至俚語其目二十有二乃官於燕京時所錄非專錄燕事也

西臺漫記六卷 刊本

右明吳郡蔣心化撰官御史時所紀畧具故事惜後多無甚關要語

事辭輯餘二冊 寫本

右明歸安沈謏撰謏先作事辭類輯一書其未盡者復爲此編大約取諸朱國楨之大政大事二記類述明代政蹟前分七畧曰武功曰封貢曰宮藩曰貴幸曰禮制曰內閣事實後則撮舉各大案本末於分紀中仍寓編年之意焉

先撥志始二卷 刊本

右明長洲文秉撰述明神廟以來如爭議建儲及東林奄禍諸事謂國本之撥實始於此

乙未私志一卷 刊本

右明太常少卿鄞縣余寅記萬歷乙未兵部大察
事

泰昌日錄一冊 寫本

右明太學生豐城楊惟休撰光宗不及改元廷議
追書之曰泰昌元年八月朔卽位盡歲止而八月
以前則仍爲萬歷四十八年惟休此編皆紀泰昌
朝事仿實錄體爲之

熹廟拾遺百詠一卷 倦圃寫本

右天啓朝宮詞百首各注本事於下有崇正癸未
自序不署名又有枕流子跋云我虞秦元方氏所

作

明季逆案一冊 寫本

右明崇正初大學士韓爌等奉命核奏客魏等罪
案

五十輔臣編年一卷 瓶花齋寫本

右不署名止載天啓七年莊烈卽位起及崇正元
年一歲之事蓋未成之編也姑錄以備考

賣菜言一冊 寫本

右記明代事及評隲人頗有直筆題曰匪齋不署
名蓋自晦之也

山書十八卷 寫本

右 國朝孫承澤撰所錄皆明季雜事

二申野錄八卷 刊本

右 國朝孫之騷撰專錄明代災異事二申者洪武戊申崇正甲申舉首尾而言也

續表忠記八卷 刊本

右 國朝給事中錢塘趙吉士撰表天啓以後忠節諸臣事續云者蓋以續錢士升之遜國表忠記也

管窺小識四卷 寫本

右 雜記明代朝政而各加以論斷未詳何人撰
平閩記十三卷 刊本

右 國朝少保三韓楊捷撰捷爲福建提督平海寇有功因自輯其章疏移檄諸件爲此

交山平寇本末三卷 刊本

右 國朝康熙初趙吉士宰交城縣時戢平各山寇其友吳興諸生夏駟親覩其事而叙記之潘耒序謂其於地形事勢曲折變化如指諸掌

辦苗紀畧八卷 刊本

右 國朝提督關中俞益謨輯凡圖誌及疏議公

續等若干件皆康熙間勦撫湖南紅苗事宜

掌故類一 總類

歷代制度詳說十二卷 寫本

右宋呂祖謙撰分十二門採擇羣書考其制度繫以詳說於古今沿革之制世道通變之宜貫穿折衷首尾備見泰定丙寅彭飛序謂此未竟之書云古今考三十八卷 刊本

右宋魏了翁撰以漢最近古用班固書帝紀隨句解釋大意以古制之變在於周末及秦古制之不復又在於漢因秦制故為此以考之原藁僅二十

則餘俱方回續成回有序

杜氏通典詳節四十二卷 刊本

右不知撰人姓名節錄杜氏通典依類增入歐陽蘇曾王以至陳傅良葉適等二十一家之文題曰增入諸儒議論杜氏通典詳節元至元間重梓西漢會要七十卷 寫本

右宋武學博士清江徐天麟撰取馬班兩史撮要合編各以類從嘉定四年進李訖戴溪序

東漢會要四十卷 內有闕文 寫本

右前人撰體例與前書相類寶慶二年進馬端臨

謂此二書所載漢家制度典章散於紀傳表者做
唐以來會要體分門編纂其用力勤矣又葉時云
仲祥父子伯仲刻意史學各有書行於世仲祥天
麟字也

兩漢詔令二十三卷

汲古閣寫本

右西漢詔令十二卷宋吳郡林慮信安程俱輯東
漢詔令十一卷宋四明樓昉輯元蘇天爵彙編之
西漢四百一篇東漢二百五十三篇各以世次日
月先後爲差比凡直叙事寔不載詞命者不錄陳
振孫云惟平獻二朝莽操用事如錫莽及廢伏后

之類皆當刪去而莽時尤多也○按宋洪咨夔原
有兩漢詔令一書不傳於世林程諸公乃仿而爲
之洪僅存總論一篇見今本卷首

開元禮一百五十卷

商邱宋氏寫本

右唐蕭嵩等撰序例五卷吉禮七十五卷軍禮十
卷嘉禮四十卷凶禮二十卷合一百五十卷按此
書先經徐堅李銳賈登張垣施敬本陸善經洪孝
昌諸人草創討論其時因王崑請刪禮記舊文益
以時事張說又上言禮記不刊之書不可改易久
無定論後經嵩及王仲邱編定蓋取貞觀顯慶二

禮折衷異同當時曾頒行天下用以設科取士周
必大序曰朝廷有大疑稽是書而可定國家有盛
舉卽是書而可行洵一代之鉅製也

大唐六典三十卷

刊本

右唐宰相李林甫等撰大體仿周禮六官之制其
沿革並入注中元宗勅云法以周官作爲唐典者
是也按此書唐會要謂開元二十七年二月中書
令張九齡等撰上韋述集賢注記謂二十六年奏
上朱彝尊曰考新舊唐書九齡以二十四年罷知
政事尋謫荊州是進書之日九齡久已去官惟程

大昌雍錄謂書成於九齡爲相之日進御當在二
十四年林甫注成或在二十七年其說良是今卷
首直冠林甫之名若與九齡無預後學所當考正
也今本係正德乙亥重刊王鏊序

唐會要一百卷

寫本

右宋守司空同中書門下平章事并州王溥撰其
書本於蘇冕兄弟并共纂四十卷迷高祖至德宗
朝止後楊紹復等續之溥乃更集兩家取宣宗以
後事廣爲百卷卷中多存蘇氏駁義建隆二年進
太祖稱其詞簡而禮備

唐大詔令集一百三十卷 寫本

右宋常山宋綬輯熙寧三年子敏求序云先君宣獻公機務之隙日寫唐之德音號令非常所出者彙之未定甲乙未爲標識則是書乃綬創始而輯成於敏求之手者今本第十四至第二十四第八十七至第九十八共二十三卷缺

唐撫言十五卷 曝書亭寫本

右唐王定保撰唐時以進士科爲重此書所載於進士故事獨詳卷尾有柯山鄭昉一跋云嘉定辛未刻於宜春郡而國朝王士正謂撫言足本從

朱竹垞翰林借鈔視稗海所刻多什之五卽今本也

五代史會要三十卷 寫本

右宋王溥撰朱彝尊跋曰五代干戈倏擾未暇修其禮樂政刑然當日累朝咸有實錄可采而歐陽子作史僅成司天職方二考其餘概置之微是書典章制度無徵矣按此編宋時曾有二刻一爲慶歷六年文潞公帥蜀時所刻一爲乾道七年施元之刻於衢郡潞公元之俱有跋見卷尾

政和五禮新儀二百四十卷 天一閣寫本

右宋知樞密院事鄭居中等撰宋初開寶有通禮
景祐有太常新禮嘉祐有太常因革禮率皆繁簡
失中大觀初乃設議禮局以居中及郭熙丁彬王
侯莫侍李邦彥葉著蘇桓張崇劉煥強淵明慕容
彥逢白時中等分任纂修於政和三年進爲書二
百四十卷首御製序一卷次御筆指揮九卷次御
製冠禮十卷其自二十一卷至四十四卷爲序則
序例四十五至五十卷爲目錄以下分五禮編載
則皆居中等所修者

太平治蹟統類前集四十卷

曝書亭寫本

右宋眉山彭百川撰畧用袁機仲通鑑本末例詳
記北宋治蹟舊本流傳甚少失其卷目文多譌闕
今本乃朱彝尊以意編錄之者百川又有中興後
集三十三卷今未見

皇宋事寔類苑六十三卷

寫本

右宋知吉州事江少虞撰采輯紹興以前朝野事
寔分類釐訂爲門二十有八少虞自序

建炎以來朝野雜記四十卷

知不足齋寫本

右宋布衣井研李心傳撰分甲乙二集各二十卷
自建炎及嘉泰七十年纂紀凡六百有五事編首

有國史院劄子公牒三通自序二通陳振孫曰上
自帝系帝德朝政國典下及見聞瑣碎皆錄蓋南
渡以來野史之最詳者

東宮備覽六卷 小山堂寫本

右宋廸功郎秘書省正字陳謨撰謨爲教授時所
進采摭故事有關教育者凡二十條各繫以論前
有進書表及自序各一勅一省劄一後序一勅有
爾經明行修齒宿才壯會粹成編以廣儲學朕甚
嘉之之語

春明退朝錄三卷 寫本

右宋諫議大夫常山宋敏求撰敏求居春明里故
以名其書自叙云觀唐人泊本朝名輩撰著以補
史遺者因纂所聞見繼之

文昌雜錄六卷 寫本

右宋朝散大夫單州龐元英撰乃元英官禮部郎
時作王士正稱爲宋人說部之佳者其實所記掌
故爲多

愧郊錄十五卷 刊本

右宋岳珂撰珂字肅之忠武王孫霖之子著述甚
多是書紀一代典故於北宋尤詳以誌禮失在野

之感云

朝野類要五卷

寫本

右宋文昌趙昇撰爲目二十曰班朝曰典禮曰故事曰稱謂曰舉業曰醫卜曰入仕曰差除曰陞轉曰爵祿曰職任曰法令曰文書曰政事曰雜制曰帥募曰降免曰退閑曰憂難曰餘紀所載多南渡以後事

金集禮十九卷

寫本

金明昌六年禮部尙書張暉等進原有四十卷今止存十九卷又自十二卷以下多缺文但按敏求

記謂此書諸家目錄俱不載藏書家亦無有蓄之者則今本雖非完書金源典故猶藉以有考焉

元典章六十卷

寫本

右書前列詔令聖政朝綱臺綱四門後依六部編次據卷首載大德七年中書省劄准江西奉使宣撫呈乞照中統以至今日所定格例編集成書又云如中統至今聖旨條奏及朝廷已行格例置簿寫錄檢舉蓋是書始事於大德七年成於至治元年而書中所載條例則自中統至延祐四年止延祐爲英宗年號七年改元至治書中稱今上皇帝

卽英宗也

元典章新集二冊 寫本

右書亦元英宗朝輯其首一條云自中統建元至延祐四年所降條畫板行四方已有年矣謹自至治新元以迄今日頒降條畫及前所未刊新例類聚梓行又末注云至治二年以後新例候有頒降隨類編入知是書所編係延祐五年至至治二年新例其延祐四年以前前所未載者間亦編入

治世龜鑑一冊 刊本

右元叅政知事趙郡蘇天爵撰凡六門曰治體曰

用人曰守令曰愛民曰爲政曰止盜

承華事畧一冊 寫本

右元朝列大夫燕南河北道提刑按察副使王暉撰采述儲闈之事於至正十八年表進按自序凡二十篇篇有圖圖後有說今本圖佚說存

大明集禮五十三卷 明內府原板刊本

右明曾魯等撰按皇明大政纂要云太祖旣克元都徵曾魯何克寬胡綸陶凱徐一夔梁寅周子諒等纂修禮書以吉凶軍賓嘉及冠服車輅儀仗鹵簿字學樂律爲綱凡五十卷 今增多三卷 名曰大明集

禮又按此書之成寔錄繫之洪武二年辛酉纂要
繫之洪武三年庚戌朱彝尊謂禮局之設始於吳
元年丁未逮己酉楊維禎續至修飾潤色之庚戌
書成當得之今本爲嘉靖九年重刊有世宗御製
序

國朝典彙二百卷

刊本

右明僉都御史蘭溪徐學聚輯始於太祖終於穆
宗前繫朝端大政後分六部編次

國憲家猷五十六卷

刊本

右明東吳王大可撰凡十四門所編自太祖迄神

宗朝止自序云上而朝廷之政足垂憲萬世與夫
典籍所載前代已試之事驗於古而宜於今下迨
卿大夫士庶人之可遵可行家門之內所必賴者
分類書之

國朝典故紀聞十八卷

刊本

右明編修交河余繼登撰凡關國家大政大本則
書非大事而於世爲急則書非大非急而爲異聞
見則書非異而事所從起則書馮琦序云

明典禮志二十卷

刊本

右明侍郎江夏郭正域輯序題萬歷庚戌正域自

言識其大者若織悉因革則有司存

皇明祖訓一冊 寫本

右明洪武二年四月命中書編次其目十有三曰
箴戒曰持守曰嚴祭祀曰謹出入曰慎國政曰禮
儀曰法律曰內令曰內官曰職制曰兵衛曰營膳
曰供用至六年五月書成太祖自爲序復命宋濂
序之

皇朝典章十二冊 寫本

右書纂集洪武至嘉靖朝詔誥

皇明詔令二十一卷 刊本

右書亦起洪武至嘉靖朝以上二種均未詳撰人

皇明誥制八卷 刊本

右明南京禮部尙書霍韜編輯列朝詔令亦至嘉
靖十八年止侍郎呂柟校刊

文華大訓箴解三卷 刊本

右明大學士崇仁吳道南撰文華大訓三則本憲
宗御製道南衍爲十二解繫以箴表進之

睿養圖說一冊 刊本

右明檢討楊觀光撰有養性養氣養體三圖圖各
有說乃青宮教育之書

三才考二十六卷 刊本

右明魏顯國撰首司天考八卷次輿地考八卷次職官考十卷卷各附圖其體做史家之志

經史格要二十八卷 刊本

右明常熟鄒泉撰做通典例分六官為編

古今治統二十卷 刊本

右明臨川徐奮鵬撰自三皇迄於元代分篇著論以詳究其治迹

典制紀畧十五冊 寫本

右國朝侍郎宛平孫承澤撰雜記古今法制名

物多援引經史及百家之說而著其原委焉

教養全書四十一卷 寫本

右國朝應撫謙撰首選舉考終鹽法考凡十二門畧用馬氏通考例

石樓臆編六卷 刊本

右國朝松江周綸輯分編六曹畧考歷代舊制參述本朝之典法於康熙初年事例為詳

掌故類二 職官

職官分紀五十卷 寫本

右宋富春孫逢吉撰以楊侃職林為本而增其門

目之亡缺補其事實之遺漏元祐七年秦觀序之
又有趙叡序

翰苑羣書二卷 寫本

右宋資政學士鄱陽洪遵彙輯李肇翰林志元稹
承旨學士院記韋處厚翰林學士記韋執誼翰林
院故事楊鉅翰林學士院舊規丁居晦重修翰林
學士壁記李昉張齊賢賈黃中李沆李至蘇易簡
等十七人禁林讌會集蘇易簡續翰林志蘇耆次
續翰林志無名氏學士年表沈該翰苑題名各家
而以遵自撰翰苑遺事殿焉凡十二種遵自跋其

後

中興館閣錄十卷 續錄十卷 寫本

右前錄十卷宋秘書監天台陳騃撰計九門首沿
革次省舍次儲藏次修纂次撰述次故實次官聯
次廩祿次職掌淳熙中騃長蓬山與同僚錄建炎
以來事爲此書丹稜李燾爲序今書多闕佚然南
渡以前官聯畧具可備參考續錄載至咸淳間止
係嘉定三年館閣重編後人次第補錄者

百官箴六卷 寫本

右宋提轄新安許月卿撰自左丞相至太子太孫

師友僚屬作箴四十九篇南宋時經進之本

元秘書志十一卷 寫本

右元著作郎東平王士點著作佐郎曹州商企翁同輯朱彝尊曰所載詔旨公移多用國書文以是流傳者罕然一代之典故存焉

官制備考二卷 刊本

右明太僕卿秀水李日華撰用明代官制標題溯其源流以見古今之別

官爵志二卷 寫本

右明尚書嘉興徐石麒撰吳焯題曰此編條理清

晰可備明史志職官之採

公侯簿三冊 寫本

右簿載明代公侯伯封襲始末嘉靖時所編

皇明功臣封爵考八卷 刊本

右明吏部郎中鄭汝璧輯紀明代異姓封者公十八人侯八十八人伯八十七人王一人凡百九十四人萬歷時猶世及者五十三人其以文臣封者公一人伯八人不得嗣者六人外戚封者公一人侯六人伯十六人惟彭城惠安以軍功得世所編自開國迄嘉隆間止汝璧自識云署中舊有功臣底

簿一帙厘厘四十五家病弗全也乃於公暇取異姓諸侯王序功分類約世封除封爲二而採券文及鄭端簡公吾學編列傳附入諸家間以見聞補其缺畧以備考核云

翰林記二十卷

曝書亭藏刊本

右不署撰人千頃堂書目作黃佐撰載明代翰林掌故極詳所記題名自永樂甲申至正德辛巳止殿閣詞林記二十二卷 刊本
右明學士廖道南撰記洪武至嘉靖殿閣諸臣寵遇及陳奏事宜自九卷以下題黃佐同編

翰林典故翰苑須知合一冊

刊本

右明張位輯有萬歷丙戌序乃官司底簿所載殊簡畧

舊京詞林志六卷

刊本

右明詹事府右春坊右諭德鄞縣周應賓撰專紀南院掌故乃應賓萬歷間掌南京翰林院事時作凡紀事者二紀典者二紀官者二自序云永樂十九年以前未分南北雖事在行在猶得系之十九年以後止載南院凡涉北院者概不書

南京太常志十三卷

刊本

右明副都御史崇陽汪宗元撰舊有太常寺卿呂
九栢容臺纂例太常博士李元錫太常沿革志二
書宗元增損爲之凡十三門

南京太僕寺志十一卷 刊本

右明侍郎應城余允緒撰書凡七門曰謨訓曰事
例曰官司曰轄屬曰規制曰丁田曰種馬采史傳
及簿籍有關牧政者皆入之

太僕寺志十四卷 刊本

右明太僕寺卿太倉顧存仁撰存仁以南京太僕
寺有志北寺獨缺因同寺丞王淑採輯故事編爲

此書

南京行人司志十六卷 刊本

右明監生吳縣翁逢春撰天啟初修神宗光宗兩
朝實錄下南京諸司各志故實時廬陵彭惟成爲
行人司副屬逢春輯爲此書書凡八門

大明官志五卷 刊本

右書載明代職官兼及道里編戶土產等末附制
儀一卷係坊肆通行之本

明職一冊 刊本

右明僉都御史呂坤撰乃坤撫山右時申誨大小

職官而作凡十八條

歷代宰輔彙考八卷 寫本

右 國朝萬斯同撰秦漢三國爲一卷晉宋齊梁陳爲一卷魏齊周隋爲一卷唐及五代爲一卷宋金元明各一卷皆具列其姓氏而於沿革大端尤爲明晰如漢時丞相不由列侯自公孫宏始大司馬大將軍輔政自霍光始三公三孤廢置不恆惟太尉司徒司空爲三公自東漢迄宋元不改漢魏錄尙書者始爲宰輔否則但爲加階侍中中書監與尙書鼎立爲三自魏晉始唐時左右僕射侍中

中書令參預朝政參知政事同中書門下三品同中書門下平章事皆爲宰相之職惟僕射爲尙書省之長侍中爲門下省之長中書令爲中書省之長唐承隋制謂之三省之長元宗以後僕射爲閒官代宗以後中書令爲加官惟同中書門下平章事終唐世不易樞密院始於唐宋則與宰相並稱兩府或爲宰相兼官明初罷丞相政權歸於六部內閣之設其秩甚卑朝班各依其品洪武後始用翰林大僚然以侍中詹事少詹入者猶不遽授大學士自張居正以侍郎入遽列銜東閣自是初拜

無不卽授大學士凡此歷代宰輔名制相承之由
皆掇舉其要分著於篇使觀者了然心目云

南臺舊聞十六卷 刊本

右 國朝常鎮道順天黃叔瓚撰叔瓚官御史時
所輯前八卷叙設官命職之意後八卷述居官奉
職之規

掌故類三 食貨

漕政舉要十八卷 刊本

右明邵寶撰首述河渠之政次舟楫之政次倉廩
之政次轉輸之政次卒伍之政次統領之政次紀

載之政次稽古之政次準今之政而以雜錄終焉
蓋寶於正德四年官總督漕運此書乃其時所作
也

漕運通志十卷 刊本

右明楊希仁撰表七卷曰漕職曰漕卒曰漕船曰
漕倉曰漕數各一卷曰漕渠二卷閘壩附焉畧三
卷曰漕例曰漕議曰漕文又圖一卷居首亦希仁
嘉靖間官總督漕運時所作

通漕類編九卷 刊本

右明按察使黎陽王在晉輯乃通述古今漕政利

浙江抄集遺書總錄
三

弊并海運事宜萬歷甲寅序

海運誌二卷

千頃堂刊
作一卷

刊本

右明總督漕運副都御史臨海王宗沐輯隆慶時宗沐會議試行海運之策因輯為此書所載題請移冊及海程遠近風雨占驗悉備

海運詳考一冊

刊本

右前人輯此則專論海運變通之宜其造舟通運之制畧具焉

民事錄十卷

刊本

右明尚書桂萼撰乃萼令武康時課民農桑種藝

錄其事爲書

救荒活民書三卷

寫本

右宋鄱陽董煟撰係表進之本煟紹聖五年進士嘗知瑞安縣述歷代卹災之政救民之策并當時名賢議論見諸施行者彙爲三卷成化壬戌莫琚序

救荒活民補遺書三卷

刊本

右明江陰朱熊撰因前編而重加補輯者

救荒策會七卷

刊本

右明祠部郎嘉善陳龍正輯取宋董煟元張光大

明朱熊三家之書益以時事彙成此編

古今槩畧九卷補九卷

刊本

右明山東都轉鹽運使秀水汪珂玉撰述明代鹽法因革之端分爲九門門各一卷曰生息曰借用曰職掌曰會稽曰政令曰利弊曰法律曰徵異曰雜考補編亦九卷分門如之二編皆自序崇正壬申所刊也

長蘆志十三卷

刊本

右明按察使吳興閔遠慶輯專紀長蘆鹽法乃姜松盤劄稿遠慶重修之

八閩政議三卷

刊本

右書無序目天一閣藏本題今名所載條款爲部運鹽法綱銀三事皆明嘉靖間閩省詳定者

淮槩本論二卷

刊本

右國朝御史鄞縣胡文學撰乃詳論兩淮鹽政利弊凡二十五條

茶馬類考六卷

刊本

右明御史沔陽胡彥撰茶法二卷鹽法一卷馬政三卷有全陝輿圖列於卷首以茶馬爲邊政所關故於鹽法下自注云歷代因革備載兩淮鹽政志

中茲不及詳者考爲茶馬作懼泛也

大明通寶義一卷 刊本

右明副使盱江羅汝芳撰分本義通義廣義三篇
所論鑄錢利弊甚晰

掌故類四 儀制

大禮集議四卷 刊本

右明禮部尙書席書於嘉靖四年奉勅編修者時
議定典獻之禮目分奏議會議續議廟議各一卷
私議則爲附錄於後書成奏御頒行

大樂嘉成一冊 刊本

萬古法程一冊 刊本

右明休寧教諭建業袁應兆撰前冊詳考文廟樂
制後冊詳考至聖四配十哲及兩廡姓名位次而
以漢唐宋元明諸儒年表附之

頌宮禮樂疏十卷 刊本

右明太僕少卿仁和李之藻撰考正頌宮祀典禮
器樂律并鄉飲酒鄉射禮疏皆各爲圖譜江都王
納諫序云李公蒞事秦郵爲頌宮具軒懸之器被
以雅音因成此書

聖駕臨雍錄一冊 刊本

右明祭酒費閻撰宏治元年駕臨太學閻因爲此
書記其儀注并錫賚諸典

雍畧二卷

刊本

右明慈溪陳念先輯念先之祖敬宗官南雍祭酒
有名其時見聞所及有足備太學掌故者因錄此

南雍志二十四卷

刊本

右明南京祭酒南海黃佐撰此則詳記南雍規制
事紀四卷職官表二卷襍考十有二卷列傳六卷

禱雨錄一卷

小山堂寫本

右明臨江知府海鹽錢琦撰自識云嘉靖乙巳秋

邑大旱余自覲時艱乃錄古人禱雨故跡爲雜說

一編脩當事者省覽焉

存心錄十卷

刊本

右明吳沉撰編次明代祭祀壇位禮儀列爲圖說
并述古來災祥可驗之事附於後

紹興十八年同年錄一冊

刊本

右書錄宋狀元王佐以下三百三十人朱子名居
五甲第九十人小名小字俱載之明宏治間重刻
錢曾曰宋朝登科錄惟此與寶祐四年者僅存則
知此錄之傳以文公故而垂之久遠爾

寶祐四年登科錄一冊 寫本

右書載策題試官姓名并文天祥對策說詳錢曾

敏求記

明貢舉考九卷

黃氏書目 刊本 作八卷

右明儀制司郎中隆昌郭元柱鹿邑知縣海州張

朝瑞同編考明代科舉起洪武四年辛亥迄萬歷

八年庚辰止

皇明三元考十四卷

述古堂寫本

右明武進張宏道張凝道同輯所載起洪武三年

庚戌迄萬歷四十七年己未止歷科殿會鄉試榜

首及館選者各著其籍凡兄弟同榜及少年登第

與歷官最顯者亦見焉

浙元三會錄一冊

刊本

右明侍郎鄞縣楊守陟輯錄浙省解首自成化六

年始為六元文會七元文會後七元文會繼之皆

有賦詩序引以誌其盛畧序本人職官贈諡而其

子孫科名宦跡亦附著之

莆陽科第錄二卷

刊本

右明訓導寧鄉吳爵輯備錄莆陽一郡科第自洪

武庚戌至嘉靖丙午止

法苑珠林通考十八卷 刊本

右明布政司參議上海王圻撰圻于續文獻通考中既撰諡法考又因其例推廣而成是書

諡苑二卷 刊本

右明宗室陸榑撰上卷采史記汲冢周書春秋釋例獨斷廣諡諸書及沈約賀琛扈蒙蘇洵鄭樵陳思諸家所述彙而編之下卷則皆明代有諡諸臣姓氏也

明臣諡考二卷 刊本

右明郎中新安鮑應鰲撰

諡法纂十卷 刊本

右明主事奉化孫能傳撰 以上二書則專錄明代諡典兼及當時議疏

冠圖一冊 寫本

右明武陵顧孟容撰考歷代冠制自司寇冠章甫冠以下各為之圖而繫以說孟容以製冠為業者有永樂間吳郡尤芳序今本圖存說亡序亦不存保和冠服圖說一冊 刊本

右明大學士張璠撰嘉靖七年光澤王奏請冠服之式上命張璠以燕弁為準參考隆殺以賜宗室

璉為圖以進此其說也

使規二冊 刊本

右明翰林院修撰東吳張洪撰洪於永樂四年銜命往諭緬甸宣慰使那羅塔在滇陽使館之暇采古人奉使得失之事分條論列用以自規後附示緬書六篇其於當時情事頗詳焉

使西日記二卷 刊本

右明太僕少卿吳郡都穆撰穆於正德間以禮部郎被命勅封壽陽王妃時作此

四譯館考十卷 刊本

右 國朝太常少卿漢陽江繁撰述異域貢獻并

國朝賜賚盛典後附譯字

掌故類五 兵刑

補漢兵志一卷 刊本

右宋宗正少卿永嘉錢文子撰其意懲宋養兵之費廣冗兵濫食不可究詰漢制寓兵於農猶為近古而班史無志因以補之自為注其門人陳元粹序王大昌跋中有綱目十六條則元粹所加也

歷代兵制八卷 寫本

右宋陳傅良輯所紀自周至宋止傅良長於經制

之學此述兵制原委具晰蓋亦有爲而作者

全浙兵制三冊 千頃堂書 刊本

右明總兵金山侯繼高輯蓋爲備倭而作也詳志水陸各軍規制并時事始末中有圖說甚精密

海防圖論一冊 刊本

右圖自浙右迄於遼東沿海險要皆備論六篇則言守禦方畧惜不著其撰人

兩浙海防類考續編十卷 刊本

右明金一龍纂范淶續修分五綱四十二目以詳籌海事宜

溫處海防圖畧二卷 刊本

右明溫州知府劉芳譽等輯亦記沿海備倭事宜芳譽跋云處無海而兼及者處居內猶堂奧也溫居外猶籬籬也籬籬固則堂奧安

江防考四卷 刊本

右明僉都御史仙居吳時來撰專紀新江營規制沿革自九江府以下至入海統爲圖說列之卷首隆慶三年自序謂新江營設水擦軍以萬計而都御史督之蓋自永樂遷都後未之有改也

呂梁洪志九卷 刊本

右明主事晉安王應時輯紀其建置事宜並采詩文之為呂梁洪而作者

類輯練兵諸書十八卷 刊本

右明少保登州戚繼光撰毘陵董承詔彙輯者繼光久任戎行其條議事宜並營陣操練及製造軍器等法各有成書承詔因類纂之以見其用兵之次第本末焉

鄭開陽遺書十一卷 刊本

右明崑山鄭若曾撰書凡五刻初刻為萬里海防圖論二卷二刻為江防圖考一卷三刻為日本圖

纂一卷四刻為朝鮮圖說一卷琉球圖說一卷安南圖說一卷五刻為海防圖說一卷海運圖說一卷黃河圖說一卷蘇松浮糧議一卷各有序跋合為一編皆其裔孫定遠於康熙間次第梓行者。按若曾為魏莊渠之門人留心實學其書皆不苟作作必有用後之言東南防禦者得以采擇於此書云

嶺西水陸兵記二卷 刊本

右明秀水盛萬年撰萬年於萬歷間為廣東僉事自記其任內設立營伍規制事宜

馬政記十二卷 刊本

右明南京太常寺少卿上饒楊時喬撰詳記明代馬政沿革條例為喬官太僕時作

火器圖三冊 寫本

右明信陽令溫陵顧斌輯詳考火器製造之法如佛狼機大將軍等名火箭火鎗火彈等制繪圖繫說前著火器原火器要二篇後附風雨賦一篇皆實濟時用不為空言者

棠陰比事一冊 寫本

右宋知常德府事鄞縣桂萬榮撰摘取歷代折獄之事比事屬詞編以韻語總一百四十四事今本係明吳訥重為刪增

法家裒集一冊 寫本

右明蘇祐輯節錄律例舉其要領本潘智所集補綴之

祥刑要覽二卷 寫本

右明副都御史常熟吳訥輯上卷載經典大訓先哲論議凡三十一條下卷載歷代治獄善可為法者十三人惡可為戒者十人

疑獄集十卷 刊本

右書前四卷爲五代和凝及其子蒙所輯後六卷爲明張景續皆類次古人折獄精密之事

疑獄箋四卷 刊本

右 國朝仁和陳芳生撰亦雜記前人剖斷疑獄之事

掌故類六 河渠

水部備考十卷 刊本

右明都水郎襄陽周夢陽輯分職官河渠橋道舟車織造器用權量徵輸供億鼓事爲十考末附吏典承行事件

海道經一冊 刊本

右書詳記海程也明應良序云不知何人所述南始聞浙北極遼東數千萬里井然具陳後附元米希顏鯨背吟一卷

治河總考四卷 刊本

右明河南按察使司僉事車璽輯所載自周定王五年河徙矜磔并歷代修治方畧至明正德間止第書內於明較詳

治河通考十卷 刊本

右明尚書松陵吳山輯亦考黃河故道及遷徙形

勢並歷代治河事蹟前列總圖

問水集六卷 刊本

右書載明嘉靖間總督河道劉天和經理黃運兩河方畧為工部都水郎中鄧城楊旦所錄後四卷俱奏議也

黃運兩河考議六卷 寫本

右不著撰人考古今河流遷徙採述成議撮其大要而加論斷焉

兩河經畧二冊 刊本

右明尚書潘季馴輯自錄總理河漕時之疏奏條

欵編為此書前列圖說

兩河管見三卷 刊本

右前人撰圖說一卷問難一卷修築事宜一卷季馴治河政蹟卓然為明代所推其著書極有倫脊誠後來者治河之龜鑑云

漕河志三卷 刊本

右明吏部尚書晉陽王瓊撰專述漕運事宜及諸河源委而詩文亦采錄焉原八卷今本止三卷

漕河奏議四卷 刊本

右明侍郎王以旂輯以旂於嘉靖間督理河道時

運河淺澀相度形勢而疏治之有前後諸議奏因彙錄之

河漕通考二卷 寫本

右明巡撫黃承元撰上卷專紀河防要務下卷詳述歷代疏濬事宜并及泉源諸湖塘工

明代河渠考四冊 寫本

右國朝萬斯同輯備採有明歷朝實錄及諸家疏奏紀述有關河渠漕政者悉按年入之起洪武六年迄崇正十四年止

治河奏績書四卷 寫本

右國朝總河三韓靳輔輯前二卷考定則例後二卷編列奏議

新河成疏一冊 刊本

右明郎中游季勳等輯自南陽至畱城創濬新河諸奏議彙而編之

膠萊新河議畧二卷 刊本

右明副使王軒輯自序云與鰲山衛指揮僉事朱繼祖登州武舉千戶周魯拾而輯之總名曰河議蓋以膠萊新河爲海運所關作此

北河續紀七卷 刊本

右 國朝孟津閻廷謨撰本謝肇淛北河紀一編
續加修纂自魚臺至天津北河源委疏治事宜俱
載焉

掌故類七 水利

全吳水畧七卷 刊本

右明華亭吳韻撰全吳謂杭嘉湖蘇松常鎮七郡
也所載水利繪圖紀畧而亦及海塘之事

三吳水考十六卷 刊本

右明御史懷安林應訓撰亦誌杭嘉七郡水利萬
歷壬午皇甫汭序謂一曰水源二曰水道次以水

年又次以水官示之經畧列之膚功繫之水田水
文終焉

吳中水利通志十七卷 刊本

右書分紀七郡之水各一卷先叙水後治績又取
前人考議奏牘序記等文摘錄其畧爲十卷末署
嘉靖甲申錫山安國活字銅板刊行惜不著撰人
東吳水利考十卷 刊本

右明王圻撰此則載嘉湖蘇松常鎮六郡水利皆
有圖說

吳中水利全書二十八卷 刊本

右明兵部尚書東陽張國維撰國維巡撫江南詳
究水利因採明代詔令勅書并歷代疏狀碑志公
移書序考說有關七郡水利者錄之有水源水脉
水名河形水年水官水治諸目前有圖說二卷書
爲崇正九年刊行

開江書四卷 刊本

右 國朝婁縣顧士璉輯前二卷爲新劉河志專
紀順治間知州白登明開濬事宜後二卷爲婁江
志統紀婁江原委新劉河卽婁江之尾閭也故合
焉

東南水利八卷 刊本

右 國朝山東道監察御史歸安沈愷曾輯前五
卷皆康熙間議疏太湖下流及劉河白茆河水利
事宜并清釐田賦等奏濬河之議愷曾發其端故
彙內外諸臣疏而錄之後三卷述宋元來前人所
志太湖水利之言

四明宅山水利備覽二卷 寫本

右宋鄞縣魏峴撰自序謂鄞之水利皆仰於宅山
峴爲里人故考其顛末爲此俾後來講明水利者
觀之易爲力云

蕭山水利二卷續刻一卷三刻三卷 刊本

右書前編為明僉事富珪輯後二編為邑人張文瑞續纂專紀蕭山西江塘及湘湖水利之事

餘姚海堤集四卷 刊本

右書為元餘姚州判葉恆修築海堤而作裔孫翼彙各家歌頌詩文次之有元人陳旅王沂二記金

華黃潛王禕二跋

新濬海鹽內河圖說一卷 刊本

右書係載明萬歷開增築海鹽土塘新濬內河二事繪圖系說不著撰人

千金堤志八卷 刊本

右明謝廷諒等輯千金堤在撫州城外所以防臨汝水患也此書志其成績並附紀咏詩文

潞水客談一冊 刊本

右書張元忭序曰徐子初入諫垣首疏言西北水利事方下水衡議未果行而徐子適以累謫太平既去都門猶對客談其疏之所未竟已而次其語為書曰潞水客談按書中不署名伯繼其字也侯考

敬止集三卷

右明祠部郎泰州陳應芳輯專論泰州河工事

掌故類八 營造

營造法式三十四卷 寫本

右宋通直郎李誠撰陳振孫曰前二卷爲總釋其後曰制度曰功限曰料例曰圖樣而濠寨石作大小木調鋸鋸作泥瓦彩畫刷飾又各分類據讀書志謂熙寧初勅將作監編修營造法式誠以爲未備乃攷究經史詢訪匠氏以成此書頒之列郡者按通考作李誠未知孰是

兩宮鼎建記二卷 寫本

右明賀仲軾輯仲軾之父盛瑞萬歷時爲繕部郎監造乾清坤寧兩宮工程多所節省以不事權貴罷職仲軾曾手疏其父所用工料以鳴其寃此書之所由作也疏稿一篇附後

造輒圖說一冊 刊本

右明屯田郎張問之撰專紀明代營造宮殿奉勅監造方輒諸式爲圖系說蓋當時經進本

西槎彙草二卷 刊本

右明工部營繕司郎中餘姚龔輝撰係輝使蜀採木時所作首卷列採運圖狀山川險惡採木之難


浙江採集遺書總錄

二

次卷皆論說劄子詩歌等文有嘉靖癸巳東吳郝鼎跋

卯洞集四卷 刊本

右明知府餘姚徐珊撰卯洞隸辰州府珊時守辰州以構廟材採木督役至其地構忠敬堂居之凡二年而役竣採木事宜悉著於篇其所著書記叙說雜著賦詩俱隱然有民勞之義焉



浙江採集遺書總錄丁集終

